

## Nochemol vom Rathenauplatz

Jetzt wo die Fassenacht erum iss werrd bei uns om Stommdisch mol widder iwwer was onnerst geschwätzt als iwwer Sitzunge. Unn schunn hawwe merr weidergemacht wo merr vor de Fassenacht uffgeheert hadde, mettem Rathenauplatz.

Ich saach: Ihr Männer, wenn zwaa Beem dort umgehaache wärn, hädd merr enn scheene große Spillplatz ferr Seniorn. Awwer dann misst merr dem Platz aach enn neie Nome gewwe, nit ooner von emm dode Politiker, naa, von ebbes was lebt unn nit sterbt – unn was immer lebt unn nit sterbt dess iss unser Flerschem, unn desdeweche sollt merr den Platz oofach „Flerschemer Platz“ daafe.

Ja, hott de Karl gerufe, Flerschemer Platz, dess wär enn scheene Nome.

Ich mach weider: Wenn der Platz freigeroomt iss, misst merr dort so fünf odder sechs Spillgeräte ferr Seniore uffstelle. Unn e paar Bänk, dass merr sich noochem Spille hiesetze kennt. Die Dinger zum Uffstelle haaße zwar Spillgeräte, awwer in Wirklichkeit sinn dess Tränningssache, die sinn extra ferr Seniorn gemacht.

Moont de Schorsch: Also koo Gäulcher, uff dene merr reide unn koo Schiff, uff dess merr klettern kann?

Naa, saach ich, dess kennde große Rädder soi, die merr oistelle kann unn doodemett dess Drehe leichder odder schwerer mächt. Dann so ebbes mett zwaa Stufe, doo konnsde mache als detsde e Trepp enuff laafe. Unn dann so wackeliche Dinger, doo stellde dich druff unn musst uffbasse, dassde nit erunnerfällst, unn dess iss ferrs Gleichgewicht, um die Wasserwooch im Ohr ze tränniern.

Außerdem leit doo noch en Stoß dicke Hölzer, die konnsde stemme odder oofach nor hochhewe, je noochdem wie vill Kraft de host. Aach konnsde dich bicke unn kloone Stoo uffem Boddem sortiern unn was immer de mächst, dess iss gut ferrs Kreiz, ferr die Muskele, ferrs Herz unn ferr de Kreislauf. Was haldern von moiner Idee?

Nit schlecht, hott de Karl gesaat, allerdings heer ich die Leit schunn motze: Enn Spillplatz ferr Ältere – dass ich nit lach! Wer gehden dort hie, ess macht sich doch kooner lächerlich. In Madrid kann dess ooner mache unn aach in Hadderschem, awwer bei uns in Flerschem? Doo werrde doch ausgelacht, wennde uff so den Spillplatz gehe dust. Vill Leit werrn aach saache, was brauche merr so enn Spillplatz, solle die Seniorn doch Nordic Wooking mache.

Awwer Karl, saach ich, dess Wooking iss aach nit jedermonns unn jederfraas Sach. Unn hosde aach schunnemol geheert, was so ebbes kräfdischere Wookerinne monchmol hinnenooch gerufe werrd? Naa? Zu spät, zu spät! werrd doo gerufe. Naa, Wooking muss nit soi. Awwer so enn Spillplatz brauch halt soi Zeit bisser oogenumme werrd. Wenner mol doo wär missde e paar äldere Leit doodemett oofonge, hiegeh, die Rädder drehe, die Trepp enuff gehe odder enn Balke stemme. Ich det merr dess getraue unn ihr doch sicher aach, odder?

Ei klar, hawwe de Schorsch unn de Karl gerufe.

Jetzt habb ich dene zwaa zugeprost: Mir drei dete de Oofong mache. De-erst emol dete mir uns uff de Bonk setze unn gucke was die onnern mache, unn weil noch mehr uff de Bänk sitze unn gucke was die onnern mache dete mir drei halt uffsteie unn on dem große Rad drehe unn e paar Hölzer stemme. Unn wenn erstemol e paar Leit oofonge ze spille dann dauerts nit long unn die onnern spille aach. Na gut, die nächst Woch redde merr weider.

Eiern Honnes